



CORSI DI LINGUA  
PIEMONTESE

Anna Boassone Daniele, ansègnant ëd piemontèis al Cors dël Borgh

## AN-NAMORESSE DLA LENGHA PIEMONTEISA

I soma rivà a la fin dël cors ëd piemontèis tenù a Borgh San Dalmass e, bele stavòlta, con un pò 'd ringret da part dj'anlev, ch'a son iscrivusse atirà fòrse da la curiosità, ma con tanti dubi e la quasi sicurèssa 'd ricavene pòch vantagi. Cost a l'é 'd sòlit l'inissi 'd minca cors, surtut quand as trata dij grand, perchè con le masnà la còsa a l'é 'n pòch diversa: ij cit a vivo 'l moment amusandse, senza fesse 'd problema ansima a coj ch'a saran ij risultà. Da part mia i son costumà a sta manera 'd pensé inissial e la còsa am dèspias gnan-ca, perchè i sai dcò com a cam-bieran le còse lesson dòp les-sion... An efet bele stavòlta l'in-teresse, l'impegn e la veuja 'd savèjne sempe 'd pì a son andàit chèrsend n'ancontr dòp l'àutr, tant a l'é vèra che stassèira a son tuti 'n pò nech e dèspiasù perchè i soma rivà a la fin. As diso già pront a 'ncaminé ël pròssim cors!

I devo dì che stavòlta ij participant a j'ero pròpi tanti epura i soma riessù l'istess a creé col sòlit bel clima 'd famija andova le pèrsone a son trovasse com a ca.

L'età dij participant a andava da l'ann 1930 al 1998, val a dì ch'a

j'ero present masnà, giovo e meno giovo e la convivenza a l'é stàita magnifica. Marco Garino e Sandro Revello a frequento

j'elementar, Cinzia la scòla media e Simona a pijarà st'ann-sì la maturità an rasoneria. Ansema ai frej Sandro e Cinzia a-i era dcò la mama che, vers la fin dël cors, a l'é riussia a fé vnì cò sò òm, ansoma, la famija al complet. A l'é nen magnìfich? E për finì, vist ch'i parloma 'd còse bele, come ma-gistra i l'hai avù, tra le tante, n'au-tra gròssa sodisfassion quandi Simona, ch'a frequenta la 5<sup>a</sup> Ra-soneria a Coni, a l'ha manifestame la decision ëd fé an piemontèis la tesi ch'a l'é d'òblighe për l'esam ëd maturità.



Èl Borgh, 22 ëd magg 2010. Anna con Simona Garino (18 ani) e (sota) antra na part dij sò anlev ëd Lengha piemontèisa, arlongh na bela sèira-vijà organisà ai 22 ëd magg da Aldo Serra, dël grup La Vos dël Cheur.



Argoment ch'i l'oma sernù ansema: Nino Còsta e soa euvra! Al prinsipi dël cors Simona a conossia pòch o gnen-te nòstra bela lenga epura a l'é an-namorasne dcò chila a la mira d'arivé a sernila për la tesi d'esam. Aleluja!

**Anna Boassone Daniele**

***Ansègnant ëd lenga piemontèisa! Vojàutri che ant ës moment i seve coj ch'a son pì angagià an sël camp për deje n'avni al piemontèis, ch'i travaje con le masnà dle scòle o con ij grand, iv anvidoma a condivide con noi j'esperienze 'd vòstr pressios travaj, com a l'ha fàit Anna 'd Coni. Vòstr esempe a sarà për tuti n'ansègnament e për vaire n'avni a imiteve!***